


大安般若守意經

下

三百三
無二

49779



佛言此般守意經卷之第一
無

後漢沙門安世高譯

出息入息自覺出息入息自知當時為覺以
後為知覺者謂覺息長短知者謂知息生滅
麁細遲疾也出息入息覺盡心者謂覺出入

息欲報時為盡亦計萬物身坐復滅心者謂
意心也見觀空者行道得觀不復見身便

空無所有者謂意無所著意有所著因為有

斷六入便得賢明賢謂身明謂道也知出何

所滅何所者譬如念石出石入木石便滅五

陰亦尔出色入痛癢出痛癢入思想出思想

入法界生死入識已分別隨三十七品



結也問曰何等為思惟無為並報思為校計惟

為聽無謂不念万物為者如說行道為得故

言思惟無為道也思為念惟為分別白黑黑

為生死白為道道無所有已分別無所有便

無所為故言思惟無為道若計有所為所著

為非思惟思亦為物惟為解意解意便知無大要報守意經下

二因緣事亦謂思為念惟為計也斷生死得

神足謂意有所念為生無所念為死得神足

者能飛行故言生死當斷也得神足有五意

一者喜二者信三者精進四者定五者通也

四神足念不盡力得五道盡力自在向六道

為道人四神足得五道盡意可得六道盡意

謂万物意不欲也一信二精進三意四定五
黠是五事爲四神足念爲力至凡六事也從
信爲屬四神足念從喜從念精進從定從黠
是爲屬五根也從喜定謂信道從力定謂精
進從意定謂意念定從施定謂行道也爲種
故有根有爲之事皆爲惡便生想不能得勝
謂得禪是因爲力亦謂惡不能勝善意滅復
起故爲力力定者惡意欲來不能壞善意故
爲力定也道人行道未得觀當校計得觀在
所觀意不復轉爲得觀止惡一法爲坐禪觀
二法有時觀身有時觀意有時觀喘息有時
觀有有時觀無在所因緣當分別觀也止惡

一法觀二法惡已盡為止觀者為觀道惡未盡
不見道惡已盡乃得見道也止惡一法為知惡
一切能制不著意為止亦為得息相隨止得
息相隨止是為止惡一法惡已止便得觀故
為觀二法為得四諦為行淨當復作淨者識
苦棄習知盡行道如日出時淨轉出十二門
故經言從道得脫也去冥見明如日出時譬
如日出多所見為棄諸冥冥為苦何以知為
苦多所罣礙故知為苦何等為棄習謂不作
事何等為盡證謂無所有道者明識苦斷習
盡證念道識從苦生不得苦亦無有識是為
苦也盡證者謂知人盡當老病死證者知万

物皆當滅是爲盡證也譬如日出作四事一
壞冥謂慧能壞癡二見明謂癡除獨慧在三
見色万物爲見身諸所有惡露四成熟万物
設無日月万物不熟人無有慧癡意亦不熟
也上頭行俱行者所行事行不分別說謂行
五直聲身心并得行也從諦念法意著法中
從諦念法意著所念是便生是求生死得生
死求道得道內外隨行起意是爲念法意著
法中者從四諦自知意生是當得是不生是
不得是便却意畏不敢犯所行所念常在道
是爲意著法中也是名爲法正從諦本起本
著意法正者謂道法從諦謂四諦本起著意

者謂所向生死万事皆本從意起便著意便有五陰所起意當斷斷本五陰便斷有時自斷不念意自起爲罪復不定在道爲罪未盡故也意著法中者諦意念万物爲隨外法中意不念万物爲隨道法中五陰爲生死法三十七品經爲道法意著法中者謂制五陰不犯亦謂常念道不離是爲意著法中也所本正者所在外爲物本爲福所在內摠爲三十七品經行道非一時端故言所本者謂行三十七品經法如次第隨行意不入邪爲正故名爲所本正所本正各自異行以無爲對本以不求爲對正以無爲爲對無爲以不常爲

對道以無有爲對亦無有所亦無有本亦無
有正爲無所有也定覺受身如是法道說謂
法定道說者謂說所從因緣得道見陰受者
爲受五陰有入者爲入五陰中因有生死陰
者爲受正正者道自正但當爲自正心耳人
行安般守意得數相隨得正便歡喜是四種
譬言如鑽火見煙不能熟物得何等喜用未得
出要故也安般守意有十八惱令人不隨道
一爲愛欲二爲瞋恚三爲癡四爲戲樂五爲
慢六爲疑七爲不受行相八爲受他人相九
爲不念十爲他念十一爲不滿念十二爲過
精進十三爲不及精進十四爲驚怖十五爲

強制意十六爲憂十七爲忿忿十八爲不度
意行愛是爲十八惱不護是十八因緣不得
道以護便得道也不受行相者謂不觀三十
六物不念三十七品經是爲不受行相受他
人相者謂未得十息便行相隨是爲受他人
相他念者入息時念出息時念入息是
爲他念不滿念者謂未得一禪便念二禪是
爲不滿念強制意者謂坐亂意不得息當經
行讀經以亂不起是爲強制意也精進爲黠
走是六事中謂數息相隨止觀還淨是爲六
也何等爲喘何等爲息何等爲氣何等爲力
何等爲風喘者爲意息爲命守氣爲視聽風

爲能言語從道屈伸力爲能舉重瞋恚也要
從守意得道也何緣得守意從數轉得息息轉
得相隨止觀還淨亦尔也行道欲得止意當
知三事一者先觀念身本何從來但從五陰
行有斷五陰不復生譬如寄託須臾耳意不
解念九道以自證二者自當內視心中隨息
出入三者出息入息念滅時息出小輕念滅
時何等爲知無所有意定便知空知空便知
無所有何以故息不報便死知身但氣所作
氣滅爲空覺空隨道也故行道有三事一者
觀身二者念一心三者念出入息復有三事
一者止身痛癢二者止口聲三者止意念行

是六事疾得息也要經言一念謂一心近念十
謂計身多念謂一心不離念謂不離念身行
是四事便疾得息也坐禪數息即時定意是
爲今福遂安隱不亂是爲未來福益久續復
安定是爲過去福也坐禪數息不得定意是
爲今罪遂不安隱亂意起是爲當來罪坐禪
益久遂不安定是爲過去罪也亦有身過意
過身直數息不得爲意過身曲數息不得是
爲身過也坐禪自覺得定意意喜爲亂意不
喜爲道意坐禪念息已止便觀觀止復行息
人行道當以是爲常法也佛說有五信一者
信有佛有經二者出家下頭髮求道三者坐

行道四者得息五者定意所念不念爲空難
不念爲空何以故念息報曰息中無五色貪
婬瞋恚愚癡愛欲是亦爲空也可守身中意
者謂意在身觀是爲身中意人不能制意故
令數息以黠能制意不復數息也問何等爲
自知何等爲自證報謂能分別五陰是爲自
知不疑道是爲自證也問曰何等爲無爲報
無爲有二輩有外無有有內無爲眼不視色
耳不聽聲鼻不受香口不味味身不貪細滑
意不妄念是爲外無爲數息相隨止觀還淨
是爲內無爲也問現有所念何以爲無爲報
身口爲戒意向道行雖有所念本趣無爲也

問何等爲無何等名爲報無者謂不念万物
爲者隨經行拍事稱名故言無爲也問設使
宿命對來到當何以却報行數息相隨止觀
還淨念三十七品經能却難宿命對不可却
數息行三十七品經何以故能却服用念道
故消惡設使數息相隨止觀還淨不能滅惡
世間人皆不得道用消惡故得道數息相隨
止觀還淨行三十七品經尚得作佛何況罪
對在十方積如山精進行道不與罪會問曰
經言作是何以故不會報用作是故也數息
爲隨十二品何謂十二品數息時隨四意止
息不亂時爲隨四意念斷得十息有時爲隨

四神足是為隨十二品也問何等為念三十
七品經報謂數息相隨止觀還淨行是六事
是為念三十七品經也行數息亦為行三十
七品經也問何以故為行三十七品經報數息
為隨四意止何以故為四意止亦隨四意斷
用不待念故為四意斷亦隨四神足用從信
故為神足也數息為隨信根用信佛意喜故
生信根亦隨能根用坐行故為隨能根亦隨
識根用知諦故為識根亦隨定根用意安故
為定根亦隨點根用離癡意解結故為點根
也數息亦隨信力用不疑故為信力亦隨進
力用精進故為進力亦隨念力用餘意不能

攘故爲念力亦隨定力用一心故爲定力亦
隨點力用前分別四意止斷神足故爲點力
也數息亦隨覺意用識苦故爲覺意亦隨法
識覺意用知道因緣故爲法識覺意亦隨力
覺意用棄惡故爲力覺意亦隨愛覺意用貪
樂道故爲愛覺意亦隨息覺意用意止故爲
息覺意亦隨定覺意用不念故爲定覺意亦
隨守覺意用行不離故爲守覺意也數息亦
隨八行用意正故入八行定意慈心念淨法
是爲直身至誠語軟語直語不還語是爲直
語點在意信在意忍辱在意是爲直心所謂以
聲息心息是爲十善隨善行也數息亦隨直見

用諦觀故爲直見亦隨直行用向道故爲直
行亦隨直治用行三十七品經故爲直治亦
隨直意用念諦故爲直意亦隨直定用意白
淨壞魔兵故爲直定是爲八行何等爲魔兵
謂色聲香味細滑是爲魔兵不受是爲壞魔
兵三十七品應設自觀身觀他人身止姪
不亂意止餘意自觀痛癢觀他人痛癢止瞋
恚自觀意觀他人意止癡自觀法觀他人法
得道是名爲四意止也避身爲避色避痛癢
爲避五樂避意爲避念避法不隨願業治生
是名爲四意念斷也識苦者本爲苦爲苦者
爲有身從苦爲因緣起者所見万物苦習者

本爲苦從苦爲因緣生盡者。万物皆當敗壞
爲增苦習復當隨八道中道人當念是八道
是名爲四爲四枝苦得四神足念也。信佛意
喜是名爲信根爲自守行法從諦身意受是
名能根爲精進從諦念遂諦是名諦根爲守
意名從諦一意從諦一意止是名定根爲正
意從諦觀諦是名黠根爲道意是名爲五根
也。從諦信不復疑是名信力棄貪行道從諦
自精進惡意不能敗精進是名進力惡意欲
起當即時滅從諦是意無有能壞意是名念
力內外觀從諦以定惡意不能壞善意是名
定力念四禪從諦得黠惡意不能壞黠意是

名黠力念出入盡復生是名爲五力也從諦
念諦是名爲覺意得道意從諦觀諦是名法
名法識覺意得生死意從諦身意持是名力
覺意持道不失爲力從諦足喜諦是名愛覺
意貪道法行道法行道從諦意得休息是名
意覺意已息安隱從諦一念意是名定覺意
息知意以安定從諦自在意在所行從觀是
名守覺意從四諦觀意是名爲七覺意也從
諦守諦是名直信道從諦直從行諦是爲直
從行念道從諦身意持是名直治法不欲墮
四惡四惡者謂四顛倒從諦念諦是名直意
不亂意從諦一心意是名直定爲一心上頭爲三

法意行俱行以聲身心猶如佛弟子八行是
名四禪爲四意斷也第一行爲直念屬心常
念道第二行爲直語屬口斷四意第三行爲
直觀屬身觀身內外八第四行爲直見信道
第五行爲直行不墮四惡謂四顛倒第六行
爲直治斷餘意第七行爲直意不墮貪欲第
八行爲直定正心是爲八行佛辟支佛阿羅
漢所不行也第一行爲直念何等爲直念謂
不念万物意不墮是中是爲直念念念万物意墮
中爲不直念也四意止者一意止爲身念息二
意止爲念痛癢三意止爲念意息出入四意
止爲念法因緣是爲四意止也道人當念是

四意止。一者爲我前世愛身故不得脫二者
念有劇怨家何以故所欲者愛生當斷已斷
爲外身觀止也。四意止者意止者意不在身
爲止意不在痛癢止意不在意爲止意不在
法爲止自隨色誠便生是爲不止也。問人何
以故不隨四意止報用不念苦空非身不淨
故不隨四意止若人意常念苦空非身不淨
行道者常念是四事不離便疾得四意止也
問何等爲身意止謂念老病死是爲身意止
何等爲痛癢意止謂所不可意是爲痛癢意
止何等爲意意止謂已念復念是爲意意止
何等爲法意止謂住時爲行還報爲法亦謂

作是得是是爲法意止也四意止有四輩一者
念非常意止二者念苦身意止三者念空有
意止四者念不淨樂意止是爲四意止一切
天下事皆隨身痛癢隨意隨法都虛不過是
四事也四意止者一者但念息不邪念二者
但念善不念惡三者自念身非我所万物皆
非我所便不復向四者眼不視色意在法中
是名爲四意止也道人當行四意止一者眼
色當校計身中惡露二者意歡喜念樂當念
痛苦三者我意瞋他人意亦瞋我意轉他人
意亦轉便不復轉意四者我意嫉他人意亦
嫉我念他人惡他人亦念我惡便不復念是

爲法也身意止者自觀身觀他人身何等爲
身欲言痛癢是身痛無有數欲言意是身復
非身有過去未來意欲言法是身復非身有
過去未來法欲言行是身行無有形知爲非
身得是計爲四意止也意不墮色念識亦不
生耳鼻口身亦介意不在身為心意不在痛
癢意不在念意不在法爲心也問誰主知身意
痛癢者報有身身意知痛癢痛癢意知意意
知有飢飢意知有渴渴意知有寒寒意知有
熱熱意知以是分別知也身意起身意痛癢
意起痛癢意意起意意法意起法意四意
止謂意念惡制使不起是爲止也四意止亦

隨四禪亦墮四意止隨四意止為近道不著
惡便善意生四禪為四意定為正意也行道
有四因緣一止身二止痛癢三止意四止法
止身者謂見色念不淨止痛癢者謂不自貢
高止意者謂止不瞋恚止法者謂不疑道人
行四意止起念生即時識對行樂得一意止
便得四意止也四意定一者自觀身亦復觀
他人身二者自觀痛癢亦復觀他人痛癢三
者自觀心亦復觀他人心四者自觀法因緣
亦復觀他人法因緣如是身一切觀內外因
緣成敗之事當念我身亦當成敗如是是為
四意定也人欲止四意棄為外攝為內已攝

意爲外棄爲內也觀他人身謂自觀身不離
意便爲觀他人身苦觀他人身爲非痛癢意
法亦尔也自貪身當觀他人身念他人身便
自觀身如是爲意止問意見行何以爲止報
意以自觀身貪便使觀他人身爲意從貪轉
故應止若意貪他人身當還自觀身也有時
自觀身不觀他人身有時當觀他人身不當
自觀身有時可自觀身亦可觀他人身有時
不可自觀身亦不可觀他人身自觀身者爲
校計觀他人身意不止須自念身爲著便轉
著他人身觀他人身爲見色肥白黛眉赤脣
見肥當念死人胖見白當念死人骨見眉黑

當念死人正黑見朱脣當念面正赤校計身
諸所有以得是意便轉不復愛身也觀有內
外嫉恚癡當內觀貪姪當外觀貪當念非常
敗姪當念對所有惡露如自觀身姪當念四
斷意也觀有兩輩一者觀外二者觀內觀身
有三十六物一切有對皆屬外觀無所有為
道是為內觀也觀有三事二者觀身四色謂
黑青赤白二者觀生死三者觀九道觀白見
黑為不淨當前聞以學後得道未得道為聞
得別為證得為知也觀有四一者身觀二者
意觀三者行觀四者道觀是為四觀譬如人
守物盜來便捨物觀盜人已得觀便捨身觀

物也觀有二事一者觀外諸所有色二者觀
內謂無所有觀空已得四禪觀空無所有有
意無意無所有是爲空亦謂四棄得四禪也
欲斷世間事當行四意止欲除四意止當行
四意斷人墮貪貪故行四神足飛但有五根
無有五力不能制但有五力無有五根不生
得四神足尚轉五力能制上次十二品四意
斷不作現在罪但畢故罪是爲四意斷也畢
故不受新爲四意止故畢新止爲止爲四意
斷故意新斷爲四神足知足不復求守意意
爲畢生爲新老爲故死爲身體壞敗爲盡也
四意斷謂常念道善念便惡斷故爲斷惡道

念善念止便惡念念生故爲不斷也四意斷者意自不欲向惡是爲斷亦謂不念罪爲斷也四神足一者身神足二者口神足三者意神足四者道神足念飛念不欲滅不隨道也四伊提鉢四爲數伊提爲止鉢爲神足欲飛便飛有時精進坐七日便得或七月或七歲也得四神足可久在世間不死有藥一者意不轉二者信三者念四者有諦五者有點是爲神足藥也得四神足不久在世間有三因緣一者自厭其身臭惡故去二者無有人能從受經道故去三者恐惡人誹謗得罪故去也神足九輩謂乘車馬步疾走亦爲神足外戒堅

亦為神足至誠亦為神足忍辱亦為神足也
行神足當飛意問何為飛意報有四因緣一
者信二者精進三者定四者不轉意何等為
信信飛行何等為精進飛行何等為定飛行何
等為不轉意謂者飛行不轉意也身不欲行
道意欲行便行神足如是意欲飛即能飛也
五根譬如種物堅乃生根不堅無有根信為
水雨不轉意為力所見万物為根制意為力
也信根中有三陰一為痛癢二為思想三為
識陰定根中有一陰謂識陰也五根五力七
覺意中有一陰者中有二陰者中有三陰者中
有四陰者皆有陰問是道行何緣有陰報以

泥洹無陰餘皆有陰也。七覺意上三覺屬口
中三覺屬身下一覺屬意何等為覺念念為
覺念念為得覺得是意便隨道也。外七覺意
為墮生死內七覺意為隨道內七覺意者謂
三十七品經外七覺意者謂万物也。覺者為
識事便隨覺意也有覺意便隨道覺有覺意
墮罪覺三十七品經便正意是為隨道覺善
惡是為墮罪也。問何等為從諦身意持報謂
身持七戒意持三戒是為身意持也。從諦意
得休息從四諦意因緣休休者為止息為思
得道為受恩也。貪樂道法常行道為愛覺意
持道不失為力覺意已得十息身安隱為

覺意自知已安為定覺意身持意意不走為
持從諦自在意在意在所行謂得四諦亦可
念四意止亦可四意斷亦可四神足亦可
五根五力七覺意八行是為自在意在所行
從諦觀者為觀三十七品經要是為守意覺
者謂覺諦不復受罪也八行有內外身為殺
盜姪聲為兩舌惡口妄言綺語意為嫉妬瞋
恚癡是上頭三法為十事在外五直在內也
從諦守諦從為神守為護謂護法不犯罪諦
為道知非常苦空非身不淨為直見非常人
計為常思苦為樂空計為有非身用作身不
淨計為淨是為不直見也何等為直見信本

因緣知從宿命有是名爲直見何等爲直治
分別思惟能致善意是名爲直治何等爲直語
守善言不犯法如應受言是名爲直語也何
等爲直業身應行不犯行是名爲直業也何
等爲直業治隨得道者教戒行是名爲直業治何
等爲直精進行行無爲晝夜不中止不捨方
便是名爲直精進方便也何等爲直念常向
經戒是名爲直念何等爲直定意不惑亦不
捨行是名爲直定如是行令賢者八業行具
以行具足便行道也八直有治有行行八直
乃得出要身不犯戒是爲直治慧信忍辱是
爲行身意持是名爲直治謂無所念爲直有

所念爲不直也。十二部經都皆墮三十七品經中。譬如萬川四流皆歸大海。三十七品經爲外思。惟爲內思。惟生道。故爲內道。人行道分別三十七品經。是爲拜佛也。三十七品經亦墮世間。亦墮道。諷經口說。是爲世間意念。是爲應道持戒。爲制身禪。爲散意行。從願願亦從行。行道所向。意不離意。至佛意不還也。亦有從次第行得道。亦有不從次第行得道。謂行四意止。斷神足。五根。五力。七覺意。八行。是爲從次第。畏世間惡身便。一念從。是得道。是爲不從次第。道入能得三十七品行意。可不順從。數息相隨止也。身口七事。心意識各

有十事故爲三十七品四意止斷神足屬外
五根五力屬內七覺意八行得道也泥洹有
四十事謂三十七品經并三向凡四十事皆
爲泥洹問數息爲泥洹非報數息相隨鼻頭
止意有所著不爲泥洹泥洹爲有不報泥洹
爲無有但爲苦滅一名意盡難泥洹爲滅報
但善惡滅耳知行者有時可行四意止有時
可行四意斷有時可行四神足有時可行五
根五力七覺意八行諦者爲知定亂定爲知
行亂爲不知行也問何以故正有五根五力
七覺意八行報人有五根道有五根人有五
力道有五力人有七使道有七覺意行有八

直應道八種隨病說藥因緣相應眼受色耳
聞聲鼻向香口欲味身貪細滑是爲五根何
以故名爲根已受當復生故名爲根不受色
聲香味細滑是爲力不隨七使爲覺意已八
直爲應道行五根堅意五力爲不轉意七覺
爲正意八行爲直意也問何等爲善意何等
爲道意報謂四意止斷神足五根五力是爲
善意七覺意八行是爲道意有道善有世間
善從四意止至五根五力是爲道善不姪兩
舌惡口妄言綺語貪瞋癡是爲世間善諦見
者知万物皆當滅是爲諦見万物壞敗身當
死以不用爲憂是爲諦觀意橫意走便責對得

制是爲陰罪諸來惡不受爲禪一心內意十
二事智慧七爲數八爲相隨九爲止十爲觀
十一爲還十二爲淨是爲內十二事外復十
二事一爲目二爲色三爲耳四爲聲五爲鼻
六爲香七爲口八爲味九爲身十爲細滑十
一爲意十二爲受欲是爲外十二事也術闡
者爲智凡有三智一者知無數世父母兄弟
妻子二者知無數世白黑長短知他人心中
所念三者毒以斷是爲三也沙羅墮苦者爲
六通智一爲神足二爲徹聽三爲知他人意
四爲知本所從來五爲知往生何所六爲知
素漏盡是爲六也

佛說大安般守意經卷下 二

無

鑽火

官上子反

忿忿

反七紅

黛眉

青上音代

胖

正降

